

帶

經

堂

集

帶經堂集卷二十五

歙門人程哲校編

新城王士禛貽上

漁洋續詩三

壬子稿

潼關

潼津直上勢嵯峨  
天險初從百二過  
兩戒中分蟠太華  
孤城北折走黃河  
復隍幾見熊羆守  
棄甲空傳犀兕多  
漢闕唐陵盡禾黍  
鴈門司馬恨如何

拜楊伯起墓道

悠悠關內路  
驅馬桃林塞  
歸鳥岳祠邊  
長河遠天外  
大鳥下潼亭  
落羽今尚在  
夕日薦蘋蘩  
愁心逐

征旆

華陰道中

平田漠漠稻花香  
百道清泉間綠楊  
二十八潭天上落  
無人知是帝臺漿

雨宿岳廟萬壽閣

松蛻龍鱗不記年  
驚人老鶴起松顛  
扶筇未到希夷峽  
先對三峰一夜眠

望華山

關中八水匯清渭  
獨朝宗黃河西北來  
交會船司空  
河流挾底柱  
岳勢分弘農  
山河兩戒首  
氣壓穀

函東金天正肅殺屹然白帝宮削成五千仞真宰  
散鴻濛及關見岌業元精羅心胸倏忽雲氣生西  
接終南峰諸峰忽已失俛首趨河潼峨峨司寇冠  
獨立青雲中蒼茫望三輔秋氣去安窮荒唐秦皇  
臘寂寞希夷蹤何當駕白鹿還共驂茅龍

華州道中

地古弘農郡雲峰去不窮泉飛名岳雨稻熟野塘  
風漕輓通河渭雄關界華嵩唐家傳七世何事失  
山東

華州齊雲樓

唐昭宗  
望京處

齊雲樓上望京師渭水東流無盡時父老尚傳行  
幸日教坊曾譜斷腸詞城空只見雙飛燕劫敗猶  
爭一局棋莫問寒煙十六宅土花凝碧至今悲

遇仙橋即事

浮雲收渭北初日照終南馳道連秋水官橋度曉  
驂人煙生浦樹鳥語入晴嵐欲訪漁川隱蘆中有

釣菴

漁川源華州  
山水勝處

渭南道中

秦川秋色迴四望極風煙樹隱金椎密花開玉井  
鮮水光浮蓮音勺山翠入藍田往昔長安道孤城

近日邊

豐原

豐原高不極原上行人度秋晴渭川望遙見藍田樹

金氏陂

金氏陂前弔稔侯麒麟高冢野花秋茂陵徐福書空在驂乘還生爾許愁

渭南望瀑園寄南鼎甫僉憲

酒曲風煙好新秋望瀑園池通清渭水花暖紫蘭村西蜀天邊節南宮雪夜樽十年鴻爪意愁絕詎

堪論

寄題華州西溪

月出少華頂寥寥天宇清孤雲收欲盡衆壑湛虛  
明杜老昔遊處西谿蘋葉生青松架壑秀白鳥逐  
舟行誰持竹竿釣解此濯塵纓

驪山懷古八首

鸚鵡何年問上皇野棠風折繚垣長銷魂此日朝  
元閣親試華清第二湯  
路滿香塵拾墜鈿諸姨五隊夾城邊花開繡嶺看  
調馬雪下離宮有賜錢

舞罷驚鴻歲月徂長門深閉長青蕪君王自愛霓裳序不記樓東一斛珠

內殿傳呼菊部頭梨園弟子按梁州善才零落龜年老渭水猶明羯鼓樓

蜀王音信渺天涯青鳥西飛日又斜斷粉殘香誰得見承恩只有玉蓮花

鳳凰原下鹿槽旁號國夫人有賜莊無數青山學眉黛當年誰入合歡堂

不復黃衫舞馬牀更無片段荔支筐祇餘今古青山色留與詩人弔夕陽



三子集  
空城幾曲水潺潺松栢淒涼滿舊山輦道無人秋  
草合年年鳴咽到人間

望終南山

青綺門邊路終南積翠陰山河三輔壯煙樹五陵  
深朝市幾遷改白雲無古今何如歸輞口水石好  
園林

新豐

寒煙漠漠新豐樹渭水東流西日暮粉榆舊社土  
花平今古行人自來去

灞橋寄內二首

長樂坡前雨似塵  
少陵原上淚霑巾  
灞橋兩岸千條柳  
送盡東西渡水人

太華終南萬里遙  
西來無處不魂銷  
閨中若問金錢卜  
秋雨秋風過灞橋

銅人原

宮門漢月渭川波  
天本無情奈若何  
今日荒原逢薊子  
愁將銅狄更摩挲

咸陽

故國臨中渭  
名山見九峻  
綠苔未央瓦  
黃土阿房宮  
王霸成何事  
興亡自昔同  
蕭條北原上  
陵樹各

悲風

渭橋懷古

秦川夕澄霽灋水明如練西上中渭橋颯然秋氣  
變羸政昔構造作此象天漢美人與鐘鼓流連恣  
荒晏徐市期不來山鬼壁已獻我昨驪山行徘徊  
弔中羨荆榛蔽銀海樵牧羅金鴈麒麟折其股冷  
落青梧觀後代復何王繡嶺明珠殿唯有終南山  
興亡幾回見

晚渡灋渭

清川生暝色鼓楫溯中流返照紅將斂終南紫翠

稠遙看雲際寺欲放漢陂舟故國東溟上茫茫清渭樓

望終南雲氣

終南雲物一千里遠橫嶓冢包商顏不雨不晴最  
窈窕一東一西時往還何日高樓尋紫閣來朝驛  
騎繞黃山無心羨汝能舒卷慙負秋來水石閒

古詩  
逢逢

白雲一東一  
西一南一北

漢武帝通天臺

通天臺畔望咸京秋入秦川雨半晴御宿不來仙  
掌散宮車已往露盤傾神光遙指虛無影渭水長

流日夜聲此去西風茂陵路相應腸斷沈初明

咸陽早發

日照長陵小市東依然蹤跡逐飛蓬未央宮闕悲  
歌裏鄠杜鶯花淚眼中已見銅人辭漢月空留石  
馬卧秋風多情最有咸陽草和雨和煙歲歲同

茂陵

武帝乘龍久上昇集靈臺古幾人登晴川淼淼通  
槐里秋草萋萋入茂陵天馬歌成愁出塞泉鳩事  
去涕霑膺誰知一代孫弘閣唯有東方諫獵能

馬嵬懷古二首

何處長生殿裏秋無情清渭日東流香魂不及黃  
旛綽猶占驪山土一丘

巴山夜雨却歸秦金粟堆邊草不春一種傾城好  
顏色茂陵終傍李夫人

飛龍務

此地臨汧渭秦嬴有舊封飛龍何日去凡馬至今  
空落落驂騑氣蕭蕭苜蓿叢黃雲秋草裏悵望古  
城東

望太白山却寄劉戶部介菴

猶並終南地初看太白高連峰停夏雪絕頂見秋

毫黑水行當近青門望轉勞渭流將客思百折去  
滔滔

武功道中

武功回首望金城古跡蕭條感乍生  
禿節尚憐蘇屬國黨人終賴竇遊平  
白頭鬱鬱身  
前事青史悠  
悠世上名  
千里終南山色好一枝筇竹萬緣輕

武功懷古

唐家慈聖寺后稷有郃封二水流沮漆千秋擬沛  
豐高原山色裏小邑夕陽中樂府康王好何時訪  
汧東

扶風道中

北望迴龍薄西行過馬嵬俠遊無柳市史筆闕蘭臺  
老鬢愁中改秋風隴上催田園情話好何事不歸來

馬伏波祠

冥冥炎海伏波祠肅肅靈旗故國思萬里功名銅馬式  
五谿淫潦跼鳶時隗囂詎識真王異朱勃終慙地下知  
空憶平生少游語歸來欸段悔教遲

織錦巷

慧絕璇璣手當如棄置何憐他蘇蕙子枉嫁竇連



波

鳳翔府

城邊汧渭兩交流隴蜀中分第一州西雍橫當斜  
谷路南山高接杜陵秋雌鳴尚憶秦人霸星隕難  
銷漢相愁形勢依然身萬里扶風歌罷拂吳鉤

和東坡開元寺憶子由韻

石刻在鳳翔府署

河潼西上千餘里五丈原邊望翠微地逼隴關寒  
更早雨晴汧水雁初飛身經紫閣筇難到囊比朱  
儒願已違夢裏倚閭雙白髮不歸真被鶴猿譏

鳳翔夢兒渾

夢裏荒雞下五更牽衣嗚咽話分明生兒曾慰王  
懷祖早死誰憐馬客卿賸有枕痕和蠟淚已無腸  
斷怯猿聲不因未悟彭殤理十七年來舐犢情

寶雞道中

時序颯已變征蓬何處休遠天吳岳影斜日渭川  
流雲棧餘高鳥磻溪有釣鈞龍鍾三十九白盡老  
夫頭

寶雞縣

險絕古陳倉停車落日黃霸圖今寂寞陳寶亦銷  
亡城郭秋雲裏人家清渭旁迴看三輔遠秦樹但

蒼蒼

石鼓山

遙憶岐陽狩來過石鼓山韓蘇今地下星斗尚人  
間谿谷歸飛少川原獵騎還寄情汧渭水千折過  
潼關

益門鎮

天險當秦鳳提封界雍梁棧雲高不落隴樹曉還  
蒼古堞催征騎秋風弔戰場山南明日路漸入武  
都羌

宿觀音菴

盡日崎嶇躡白雲常明燈下息勞筋亂山斜月朦朧裏一夜風雷瀑布聞

大散關

石壁橫千仞盤盤上翠微行人縈閣轉鸚鵡下山飛戰壘空埋鏃巖關幾合圍雲車與風馬髣髴夜深歸

和尚原

納納乾坤大吾胡淹此留箐林連虎穴毒霧起龍湫瀑急雷霆鬪天荒魑魅愁思因飛鳥背浩蕩返齊州

煎茶坪

大壑沉雲霧冥冥萬仞梯孤峰分隴漢兩水劃東  
西坪東水北流  
西水南流遙直金牛峽旁臨白馬氏當年誰設險  
不用一丸泥

自長橋至草涼樓

西下嘉陵水瀾瀾綠滿灘緣崖紅叱撥紫棧曲欄  
杆九折行人少千峰落日寒不知投宿處樵響隔  
雲端

鳳縣

險絕岐南路峇堯蜀北門千峰圍邸閣一線望中

原城下嘉陵水林間謝豹村  
衰遲慙鳳德愁向接輿論

鳳嶺

南岐地何高鳳嶺踞其右  
路絕無鉤梯直上若懸溜  
日月互蔽虧光明錯昏晝  
雲霧四蕩滴雷車中雜糅  
飛龍何衙衙天矯出巖竇  
俯瞰兩當水奔流下騰湊  
轉石類搏擲畫沙成篆籀  
初疑飢蛟螭更作外蛇鬪  
聞昔周文王盛德及靈囿  
鳳鳥此來集世遠事悠謬  
末季重邊防戎馬幾馳驟  
秋風吹散關一夕驚老瘦

寄家人

京洛分襟七夕前  
南岐驛路五更煙  
故園刀尺齊紈素  
遠道風花蜀國絃  
斷續鸚飛深塢裏  
橫斜雁度夕陽邊  
棧雲隴樹重重隔  
閨夢何由向左綿

棧道懷歸

棧雲千疊打包來  
兩鬢蕭條萬慮灰  
陵跼幾能開口笑  
鴻蒙真擬掉頭迴  
鴛牛鴛馬從時好  
功狗功人未易才  
夢裏故園漁釣穩  
金鵝飛處白蘋開

柴關嶺

早發陳倉道馬蹄亂  
雲霧行行到柴關  
雲低雨傾

注哀徑中槎牙幽篁四森布大石立當關勢如猛  
虎踞世無飛將軍磨牙爾何怒蛟龍喜昵近氣奪  
生憂懼怪鳥時一啼聞聲不知處黑江遠瀕洞萬  
瀑齊奔赴頗聞紫栢山仙靈所遊寓石髓倘一逢  
白日生毛羽誰使野鶴姿璫璫墮籠笈真宰不可  
問更向蒼茫去

雨度柴關嶺

棧中新漲未歸槽百丈柴關水怒號鳥語不聞深  
箐黑馬蹄直上亂雲高天垂洞壑蛟龍蟄秋老牙  
鬚虎豹豪誰識熏香東省客戎衣斜壓赫連刀



南星雨發

驟雨南星道秋陰草木風澗寒傷馬骨雲亂失蠶  
叢僭憶公孫帝危知大禹功中原何處所夢落散  
關東

年來錢牧齋吳梅村周櫟園諸先生鄒訐士  
陳伯璣方爾止王亦世董文友榮洞門諸  
同人相繼徂謝棧道感懷愴然有賦

載酒題襟處處同平生師友廿年中九原可作思  
隨會四海論交憶孔融春草茫茫人代速落花寂  
寂墓門空白頭騎馬嘉陵路唯有羊曇恨未窮

雨趨留壩

急雨下烏攏千峰一線通路遙洋水北天盡武關  
東峽偏風雷氣人穿虎豹叢誰知星使節今夜託  
牛宮

畫眉關南渡野羊水

四山封窳窳一水急波瀾巨壑蛟潛穩飛流馬渡  
難陰崖終古閼白日幾時看惡竹縱橫甚還須斫  
萬竿

武關寄家書

驛騎千山裏平安兩字書高堂衰白早兒女死生

三子  
餘聽雨思兄弟臨風問起居白頭吟更苦莫負錦  
江魚

馬鞍嶺

南下畫眉關遠色疊諸嶺夤緣百里間斷齟蔽光  
景蹇嶮疲登降纖路亦修整或厂如連軒或植如  
負屏或如岐陽鼓或如宛胸鼎如鳥或跂翼如魚  
或骨鯁殊狀紛角逐詭類爭一逞峭岸勢欲圻捷  
足不遑騁二分垂在外趾壓後人頂飛瀑時界道  
赴壑力逾猛人與水鬪爭心目各相警天意限雍  
梁設險有斯境君子履忠信小人懷僥倖永念垂

堂言乘危更三省

宿馬道江上

江流太悲壯客夢自難安  
汚漢千山阻梁洋八月  
寒羌兒稀聚落氏道賤衣冠  
漸達褒城驛遙遙度  
七盤

觀音碓

本名閭王碓賈中丞改今名壁上  
有宋荔裳賦棧道平歌沈縉堂書

觀音碓險絕連山列天仗  
奔峭洶波濤大石蹴龍  
象造物鬱磊砢及茲乃一放  
急瀑何砰訇盤石成  
巨防渟爲千丈湫潭潭不流  
宕怪物中屈蟠豈無  
鎖紐壯儻燃牛渚犀窮此精  
靈狀頗聞賈中丞於

此鏟疊嶂故人推沈宋詩筆各雄長  
星宿森光芒虬龍怒倔強解鞍苔石滑  
高歌一神王更須巨靈手運斤出天匠  
鑿我郁閣銘敵彼小海唱

七盤嶺

七日行褒斜目瞶耳亦聾濁浪崩崖垠  
征衣碎蒙茸不知天地濶詎測造化功  
岌然土囊口雞幘摩蒼穹磴道上七盤  
大翮排天風絕頂忽開豁白日當虛空  
褒水出谷流漢江繞其東巴山跨秦蜀  
蜿蜒連上庸川原盡沃野天府如關中  
橘柚鬱成林稻苗亦芄芄襄陽大艑來  
千里帆檣通當年号天

漢運歸隆準公將相得人傑驅策芟羣雄一戰收  
三秦遂都咸陽宮智勇久淪沒山川自龍從跋馬  
向褒國日落煙濛濛

閏七夕抵褒城縣

褒斜十日路白髮忽侵尋紅葉下江水始知秋氣  
深馬驚初出谷城閉不聞砧何處天河影浮雲只  
自陰

哭渾沂兩兒

閏七月初八夜  
南鄭使院入夢

謝傳當年枉教兒西風江漢鬢成絲傷心寒食棠  
梨雨兩地孤墳哭向誰

帶經堂集卷二十五

帶經堂集卷二十六

歙門人程哲校編

新城王士禎貽上

漁洋續詩四

壬子稿

漢中府

路繞褒斜夢故園  
今朝風物似中原  
平蕪蹀躞連錢馬  
近郭參差橘柚村  
萬疊雲峰趨廣漢  
千帆秋水下襄樊  
只愁明日金牛路  
迴首興元落照昏

漢臺

絳灌當時伍黥彭  
異代看竟成隆準  
帝不屑沐猴冠  
磊落眞王氣  
蒼茫大將壇  
風雲今寂寞  
江漢自



波瀾

故宮曲二首

濕螢幾點粘脩竹昏黃月映蒼煙綠金牀玉几不  
歸來空唱人間可哀曲

往日朱門帝子家柴車一去即天涯平臺賓客今  
何處零落小山叢桂花

漢中偶題排悶

漢川風土佳可憐復堪憶佳鱖持作羹黃柑耀金  
色自我歷周秦見此邾莒食阿瞞非解人區區笑  
雞肋

虛谷菴二首

菴有黃楊  
二最奇

三寸黃柑水浸渠一林紅桂映棕櫚  
鈎簾恰對中梁色正好高眠讀道書

太息黃楊樹子前琳宮幾歲飽風煙  
交柯接葉真憐汝未似先生厄閨年

南鄭至沔縣道中雜詠二首

黑水梁州道停車問土風  
沔流天漢外蟠冢夕陽東  
處處棕櫚綠村村穰稔紅  
更須參玉版脩竹賤如蓬

漢川脩竹賤如蓬坡公詩語

歲歲桃花水魚從丙穴來  
金盤飛素雪玉手潑新

二七九  
醅茶戶雨中焙橘官霜後開山南風土美去住一徘徊

女郎廟

女郎山相傳是張魯女

朝過女郎道遙望女郎祠溪水疑環珮春山學黛眉  
千林丹橘熟一徑碧苔滋日暮神靈雨西風滿桂旗

沔縣謁諸葛忠武侯祠

天漢遙遙指劒關逢人先問定軍山惠陵草木冰  
霜裏丞相祠堂檜栢間八陣風雲通指顧一江波浪  
急潺湲遺民衢路還私祭不獨英雄血淚斑

武侯琴室

竹篠娟娟靜江流漠漠陰至今籌筆地猶見出師  
心遺恨成銜璧元聲有故琴千秋絃指外髣髴遇  
高深

定軍山諸葛公墓下作

高密起南陽文終從去聲高祖暴繫本見疑數仞亦  
非武堂堂諸葛公魚水託心膂二表匹謨訓一德  
追伊呂視操但如鬼畏蜀還如虎嗟彼巾幗徒與  
公豈儔伍紫色復蛙聲抵隙各爲主火井方三災  
赤伏更平聲典午志士恥帝秦祭器猶存魯陰平一

失險面縛忘奔莒知公抱遺憾龍卧成千古峨峨  
定軍山悠悠沔陽潁鬱鬱冬青林哀哀號杜宇耕  
餘拾敗鏃月黑聞軍鼓譙侯寧足誅激昂淚如雨  
大安驛

犖确三泉縣坡陀一徑開江流沮口合風雨沓中  
來漢相經營地氏王駕馭才西窮蟠冢盡節使亦  
雄哉

五丁峽

南窮石牛道崑崙下雲棧三日招我魂足踔目猶  
眩豈知東蒼州耳目益奇變始過金牛驛膠嶠已

凌亂漾水從北來劣足泛鳬雁舉頭嚙豕山峨冠  
倚天半大哉神禹功從此導江漢漸入五丁峽譎  
詭駭聞見斗壁何寧爭十萬磨大劒攢羅列交戟  
茫昧通一線亂水殷峽中蛟蜃喜瀾汗仰眺絕圭  
景俯聆競雷拊九鼎鑄神姦到此百憂患東方牧  
犢兒竟使蠶叢判我行忽萬里風土異鄉縣身落  
大荒西終賴皇天眷咄咄復何言艱虞一身賤

雨度五丁峽

徼外蕃王國荒荒巨峽侵龍居三洞秘熊館四時  
陰笮馬何年度金牛此路深五丁虛斧鑿愁絕畏

登臨

懷朱人遠

憶汝西來日江山發興奇  
戎州千日飲夔府百篇詩  
湘水蘅蘭浦巫山雲雨祠  
金牛寒峽裏北望苦相思

寧羌州

威遲辭北闕浩蕩賦西征  
天險金牛峽悲歌猛虎行  
岷峨連雨氣沔漢走江聲  
三戶遺民少蕭條見廢城

寧羌夜雨

不信無晴日曾聞有漏天武都連夜雨巴子幾人  
船山入氏中亂寒臨棘道偏荒城聞鼓角回首意  
茫然

夜至黃壩驛短歌

氏道森沈十日雨石林冥冥斷行旅洪濤殷地四  
山動百折盤渦噤難語前有蝮蛇後豺虎紅鶴哀  
號奮毛羽吾生胡爲狎此曹命輕如毛爭一縷妻  
孥飄泊寄京國欲歸不歸在何所鄉關回首四千  
里縱有苦辛誰告汝

百牢關懷家兄子底禮吉子側



行盡山南路前峰入宕渠殘秋杜陵鴈斜日錦江  
魚一別四千里何因頻寄書只思風雪裏燈火共  
吾廬

龍背洞

衆山如連鰲突兀上龍背鱗鬣中怒張風雨晝晦  
昧出爪作之而神奇始何代亂水趨嘉陵波濤勢  
交匯萬壑爭一門雷霆走其內直跨背上行四顧  
氣什倍夕陽下岷峨天彭光破碎咫尺劍門關益  
州此絕塞子陽昔躍馬妖夢成伯儼區區王與孟  
泥首終一概李特亦雄兒僭竊竟何在

朝天峽

朝登嘉陵舟日出羌水赤履險倦鞍馬即次亦稱  
適黥黥雙峽來突見巨靈跼嶄巖無寸膚青冥厲  
雙翻陰崖積龍蛻跳波畏鯨擲往往壓人頂駭此  
欲崩石洞穴峽半開兵氣尚狼籍蛇豕據成都置  
戍當險阨至今三十年白骨滿梓益流民近稍歸  
天意厭兵革會見賓盧人燒畬開确确慷慨一扣  
舷浩歌感今昔風便黎州城茫茫波濤白

廣元縣作

樹樹皆猿狖山山盡薜蘿算錢灘下水不及客愁

多

廣元舟中聞棹歌

江上渝歌幾處聞孤舟日暮雨紛紛  
歌聲漸過烏奴去九十九峰多白雲

昭化縣

亂山圍一縣哀柝下初更近郭雙江合  
扁舟萬里情浪翻寒月影風急夜潮聲  
何限人間事茫茫恨未平

桔柏江

小舟飛青鵲西掠馬鳴閣閣道凌天關  
稍幸息腰

脚茫茫雙江來抱此益昌郭荒城豺虎多殘堞出  
叢薄國憶苴侯開江疑鼉靈鑿武都地勢高衆水  
競流落分道下氐羌兩川乃磅礴鳴水迴驚瀾陰  
平劃大壑仇鳩勢未彛犀牛道彌惡千里會葭萌  
崩騰似相索湔湔竟同流西逝連井絡九十九峰  
閒迴首一錯愕

昭化夜泊

浙浙風欺枕明明月入船三巴空有淚獨夜不成  
眠流宕魚鳧國淒其鴻雁天故園梅信早歸去逼  
殘年

虎跳驛

路逗蒼溪縣荒涼破驛存  
漉金稀見艇畏虎早關  
門水合南江壯山連大劍  
昏巴西兵馬後多少未  
招魂

夜泊雙漩子聞笛

嘉陵江上泊舟時  
戍鼓初停月上遲  
已聽寒潮不成寐  
誰家橫笛怨龜茲

蒼溪縣

萬里行難到三秋鴈  
不過蠻江吹積雨  
急峽束盤渦綿谷  
青山遠賓人白弩  
多泛舟思杜老漂  
泊意

如何

閬中縣二首

見說閬中好，軒牕臨錦屏。  
山川無髣髴，耆舊況凋零。  
殘壘浮兵氣，寒江滯使星。  
忽聞羌笛起，風雨畫冥冥。

滕王何寂寞，江抱玉臺偏。  
沙岸收賓馬，湍流激磴船。  
五城虛夢到，三戶有人煙。  
不奈驚搖落，魂銷帝子前。

閬中感興四首

行役忽永久，衣裳白露淒。  
秋風吹劒外，客鬢老巴

西螢火飛還沒寒蟬咽復啼不堪蜀道雨山霧晝  
常迷

巴樹小搖落薄寒初中人江山紛暮節風露感蕭  
晨遠使非邛杖思歸闕角巾流波三峽外何處覓  
文鱗

西漢茫茫去來過碧玉樓九迴腸已斷三折水還  
流涕淚聞鶻鳥雲山繞劒州老親穿望眼霜雪白  
盈頭

蜀雨連秦棧秋陰暮復朝山盤黃鶻急江合紫羌  
遙烏鵲知何意黿鼉爾獨驕蓬萊不可到迴首向

風臙

藥物

藥物知何益愁多老病侵  
眼枯兒女淚心折短長吟  
鄉信何時達秋濤日夜深  
巴猿殊造次悽絕叫楓林

望劍州懷喬文衣

名鉢內丘名士以湖  
口今遷守劍州卒官

次公狂自好名字滿人間  
才士無高位吟魂寄百蠻  
音書湖口縣生死劍門關  
太息青蠅弔交州幾歲還

寄綿州守



西南芳草路幾驛到綿州蜀道風雲外涪江日夜  
流丹青楚公壁城郭越王樓故里康浪水何人弄  
釣舟

龍山驛雨

閬州城邊雲氣浮龍山驛裏雨聲愁遠遊不唾青  
城地絕域空悲白鴈秋巴嶺稀逢人北去渝江長  
是水南流蕭條孤館荆榛夕更指千峰入漢州

富村驛雨

陰蟲何太苦戶外即蒼山急柝侵孤枕秋河落百  
蠻燈昏山鬼逼雨止蟄龍還一夜彌江水愁人淚

點斑

天馬山雨行

兩炬殘更裏亂山高復低疾風吹白雨折坂下青  
泥詰屈穿牛角縱橫印虎蹄廿年餘戰骨何處聽  
荒雞

鵝溪

剝水殘山祇益愁梓州荒絕接隆州眼明今日鹽  
亭路十里鵝溪碧玉流

鹽亭縣南渡梓潼江

南下孱亭路千峰挾雨秋江潮不送客獨向射洪

流

秋林驛雨

積氛常不徹天地日冥冥俗雜蟾蜍種林深虎豹  
扃荒村陰峒黑寒夜鬼燐青夢裏夔門路開頭下  
洞庭

晴

已厭鹽亭雨初逢廣漢晴斷橋人影出沙路馬蹄  
輕鷗鶚三秋擊弓刀萬里行浮雲西北去何處望  
神京

涪江

十日巴西雨艱難到梓州晚晴見涪水清絕抱南樓  
不見千頭橘空驚萬里秋尚餘登覽興留眼望牛頭

潼川懷少陵

返景下東津扁舟涪水濱女牆崩積雨郡郭入荒榛  
山夕煙花少江流戰伐頻飄零思弟妹嗟爾杜陵人

艤峽

聞有蘇公泉何處尋遺跡空留艤峽名一片東山石

潼川夜雨忽夢行臨安道上旁人指示曰此  
臨平也覺而有作

荒城無漏夜啼鴉夢向臨平詠藕花忽聽梧桐樓  
畔雨鄴江江外是天涯

顏魯公干祿字碑

顏常山曾爲梓  
州司法參軍

古碣卧蒼苔鬱律蛟龍走正氣不磷淄常令鬼神  
守

晴

積霧東川道飄蓬劒外州不愁山險阻轉恨雨淹  
留乍豁青天影遙通白帝秋舉頭真見日吹角散

蚩尤

建寧驛

銅山行不到樹木晚蕭蕭水亂無行舸  
棚危有斷橋負塗人久病齒膝馬難騎  
魂斷南荒裏休吟楚客招

中江縣

慘淡黃雲暮行人出草萊風濤兩江合  
斜照亂峰開秋老飛鳥縣鄉遙戲馬臺  
郛筒何處是一月罷啣盃

天柱山

朝出元武門雲垂雨忽凍登登天柱山千盤墮頽  
洞崢嶸逾巴閬槎牙過秦鳳陟嶺如累基下谷如  
入甕心俯尻益高足縮目先送敢嗟鳥獸羣稍喜  
徒旅衆我有大羽箭麗龜輒命中於菟昂其首飲  
羽乃不動道旁松合抱臣可任梁棟惜哉野蔓纏  
不蒙匠石用絕頂見岷山青城亦伯仲一氣連諸  
蕃三州實西控太平幸無事左髻時入貢念彼松  
姚戍坐甲苦飢凍俯臨陸海雄仰視天宇空長嘯  
千仞岡出險忽如夢

天柱山絕頂望見岷山作

鞍馬衆峰頭蒼茫萬里收岷山橫塞出灌口接天  
流要害三城戍邊防八月秋大荒飛鳥外眼底盡  
姚州

天柱山竹

雲津橋畔千竿竹蕪沒荒叢也可憐恰似佳人在  
空谷天寒翠袖阿誰邊

連山舖夜雨

自汚至此千餘里山始盡少陵詩  
連山東南斷始見千里斷即此

蜀雨常侵夜秋泥不肯晴幾聲街鼓寂四壁草蟲  
鳴山遠魂猶怯愁多夢易驚鹿頭關外路明日漢  
州城



山中有蟲聲如擊磬甚清越蜀人謂之山子

又有花名龍爪甚豔偶成絕句

稻熟田家雨又風枝枝龍爪出林紅數聲清磬不知處山子晚啼黃葉中

題漢州驛壁

漢州城郭劫灰前房相西湖有斷煙更問臉波添

幾許昨宵金鴈驛中眠

唐人漢州詩十口醉眠金鴈驛臨岐無限臉波橫

望青城山

雲氣連西域名山作漢標千秋軒帝蹟每夜岳靈朝玉宇凌丹壑神鸞下碧霄丈人一招手天路未

應遙

彌牟道中望八陣圖遺址

落日彌牟道霜風百戰場青天迴玉壘遠樹出華陽  
陸海三都闊雄圖八陣荒卧龍虛故蹟駐馬惜降王

新都縣題楊升菴先生故宅

有二相樹尚在

侍臣遷謫後常憶泰陵園詞賦留金齒生還望玉門  
交州無士燮南海得虞翻廢宅西風裏連蜷桂樹存

嘉陵舟中懷李容齋陳說巖葉訥菴程湟溱

魚鼓郵籤水驛船夜隨沙雁宿寒煙江湖寄訊鴈  
鷺侶白首情親二十年

閨中懷沈繹堂

葭萌關外極天涯長憶西園夜鬪茶萬事輸他前  
定在今朝真看閨中花

予近爲繹堂書放翁詩三疊淒涼渭城曲數枝閑澹閨中花不意遂成詩識也

鹽亭懷施愚山

嵩少新詩見典型昔遊迴首歎晨星雲溪花映冷  
冷水却向鹽亭望敬亭

懷汪鈍翁

汝卧蘇臺今幾年敬容殘客罷周旋相思濯錦江

頭望不見東吳萬里船

懷劉公戰

越石清剛本異才  
譙南獵罷幾啣杯  
臂間白竹新  
寶弩不共山南射虎來

懷曹顧菴

感逝傷離此寸心  
故人書札重南金  
竹郎祠下風  
吹雨腸斷巴猿一夜吟

懷宋荔裳相次入蜀

宋玉高唐賦早成  
楚雲遙憶片帆輕  
知君胸次嶂  
嶻甚欲共濤頭赤甲平

懷梁曰緝

驄馬歸來吏隱兼  
長齋唯對水晶鹽  
他年相見嵩陽寺  
更爲貧兒下幾籤

帶經堂集卷二十六

帶經堂集卷二十七

歙門人程哲校編

新城王士禛貼上

漁洋續詩五

壬子稿

防秋

聞道防秋急千山復萬山  
傳烽來熨道插羽過靈關  
屬國何嘗絕懸軍且未還  
却思漢丞相心力盡  
征蠻

同鄭水部飲某都督宅

幕府開高宴軍城報暮秋  
風霜嚴壁壘貔虎靜更籌  
蕃部休移帳元戎已伐謀  
遙憐征戍苦坐甲雪

山頭

登成都西城樓望雪山

秋老錦官城西風捲旆旌霜高犀浦落日出雪山  
明黎雅初增戍松潘未罷兵誰能凌絕頂萬里一  
崢嶸

金方伯邀泛浣花溪二首

解纜江村外溪沙失舊痕夕陽來灌口秋水下彭  
門清吹臨風緩神鴉得食喧百花潭上好新月破  
黃昏

萬里橋邊去還多弔古情人煙過蠶市新月上龜

城寂歷更漏發蕭條鱗甲生迴看草堂路修竹水

蕪平

王蜀徐妃詩又  
驅金翠入龜城

九日謁昭烈惠陵

萬里登高日橋山白露寒至今悲蜀帝何處問祠  
官杳杳衣冠閑淒淒封樹殘錦江非渭水猶作霸  
陵看

武侯祠別鄭次公水部

白雁三秋候青山萬里橋與君俱絕域此別更魂  
銷遺廟丹青盡荒陵草木凋

祠西即  
惠陵

平羌江上水相

望隔風潮



金花橋道中作

半年浪迹錦城遊，纔數歸程已暮秋。  
晚照開時見千里，寒鴉飛盡過雙流。  
眼明修竹橫塘路，心逐江雲下峽舟。  
異域忽驚搖落久，今宵一醉失鄉愁。

雙流縣

今廢入新津

路近雙流縣，縈紆一徑斜。  
雞鳴深竹裏，暝色幾人家。  
日暮寒雲合，城荒野蔓遮。  
愁將蓬鬢色，絕域老霜華。

新津縣渡江

南過蠶叢國，秋風正授衣。  
青山初日上，黃葉半江飛。

飛修竹連千畝高栴徑十圍臨流呼渡舸極目一  
清暉

修覺山下

田中處處稀秧馬竈下家家爨籜龍記取新津江  
畔路蒼崖紅樹雜秋冬

眉州謁三蘇公祠

祠即故宅今  
爲眉山書院

驀頭山色腴不枯玻璃江水如醍醐眉州城郭劫  
灰後水脹漠漠成榛蕪郵亭下馬詢老卒蘇公故  
第城西隅旋來東帶薦蘋藻辰良何必煩神巫往  
者此地鐵腳亂

順治初有賊據  
眉號鐵腳蠻

高門大宅皆焚如此祠

歸然誰所作維公大節驚頑愚雙栢輪囷溜霜雨  
廷立冠劍古丈夫長公遺像龍眠筆馬券剝落涪

翁書

祠有石刻龍眠畫東坡像賴濱贊又坡畫司玉鼻驛卷山谷有跋

殘碑插笏尚林立紫藤

碧蘚纏龜趺祠西一水最蕭瑟經霜菡萏猶扶疎  
甘蕉一丈覆簷雷落花亂迸紅珊瑚當年結構不  
草草要令咫尺成江湖故園如此不歸老與人家  
國徒區區瓊儋雷藤歷九死口甘熏鼠隨猿狙頭  
網八餅有何意桄榔萬里非吾廬兩公神靈未磨  
滅應翳白鳳遊清都遊戲下界亦聊爾鯢鵬豈必  
捨枋榆眉州玻黎天馬駒

陸務觀詩句玻黎春眉州酒名

酹公三酹公

歸乎

雨發

五更吹角罷細雨出眉州雜樹堆紅葉蠻荒感白  
頭岷峨雲氣接邛僰亂山稠東望玻璃水風前葉  
葉舟

眉州松江

暮頤山色盡空濛憶昨蘇祠卷碧筒殘醉未醒排  
馬去松江秋雨似吳淞

石佛山懷東坡先生

坡公寄子由詩卜田向何許石佛  
山南路下有隱家川千畦種秔稌

遺祠蒿穰蔓寒煙石佛山南更可憐欲問先生卜

田處西風何處爾家川

夾江道中寄朱峨眉方菴兼懷蔣修撰虎臣

蔣時卧病峨眉伏虎寺

絕域相逢感鬢華幾行清淚落悲笳愁中巫峽暮  
雲合沙裏峨眉秋月斜方丈一燈誰問疾孤帆萬  
里客還家故人咫尺不相見夢繞平羌江水涯

夾江縣

地近川南好孤城罨畫間江山真萬里雨雪到諸  
蠻馬渡青衣水雲遮紫目關大峨天半落相見一  
開顏

夾江道中二首

沈黎東上古犍爲紅樹蒼藤竹亞枝騎馬青衣江  
畔路一天風雨望峨眉

嘉陽驛路俯江流寒雨瀟瀟送暮秋誰識蠻中風  
景別洋州風竹戴嵩牛

九盤望峨眉

紺壁臨千仞蕭蕭木葉黃水流通越雋峰遠入江  
陽十月蠻雲澹三峨積雪蒼來朝掛帆去回首意  
茫茫

九盤

燕子編高曾按轡飛仙閣迴獨題詩九盤山下瀉  
江水石棧縈空又一奇

竹公溪二首

漏天未放十分晴處處江村有笛聲水遠山長聽  
不足竹郎祠下竹雞鳴

竹公溪水綠悠悠也合三江一處流珍重嘉陽山  
水色來朝送客下戎州

入嘉州即問丁東院無知者過高望山趾廢  
寺鄭生曰丁東寺也訪方響洞尚存感而  
賦詩

廿年夢想丁東院何意丁東院裏來山水清音空  
復在劫灰殘燒自生哀井欄僧汲稀銅鉢石甃秋  
深長綠苔不遇江南老桑苧風爐誰遣試茶盃  
放翁  
丁東院詩我是江南老桑苧諸君小住共茶盃山谷詩古人題作丁東水自古丁東直到今我爲更名方響洞始知山水有清音

### 登高望山絕頂望峨眉三江作歌

四海復四海九州還九州河伯海若更相笑螭蛄  
何足知春秋今年辭帝蓬萊宮乘風偶作西南  
遊中條姑射不足數失喜太華揚高旒河潼遠圻  
巨靈跼鉤梯百丈臨龍湫終南太白幻雲物秦棧  
詰屈哀猿愁錦城小住五十日岷山秀色垂簾鉤



青城玉壘尻首接灌口屈注雙江流興極欲躡大  
峨脊却騎瘦馬來龍游嘉州罨畫枕江上孤峰縹  
緲東南浮神霄玉清有遺跡登臨可以消煩憂躡  
泥盤盤到絕頂江山披豁開雙眸峰巒八面簇金  
碧下瞰江海如浮漚八十四盤在衣帶氣凌五岳  
驕公侯暮雲早雪互明滅兜羅綿現無時休岷江  
從東來奔騰迴萬牛沫水滙青衣簸蕩千斛舟三  
江九峰倏然合丹崖翠嶂窮雕鏤江山奇麗冠天  
下何意絕景來蠻陬天風蓬勃日西墜搔首欲去  
仍淹留荆吳萬里自茲始來朝起柁尋巴丘

三登高望樓作

風流曾說荔支樓欄檻高明壓四州

謂戎眉  
邛雅也

峨頂晚

霞寒白雪江心殘照出烏尤雲煙早暮還殊態楓  
柏丹黃只似秋自笑心情無賴甚清晨臨眺不梳  
頭

曉渡平羌江上凌雲絕頂

眞作凌雲載酒遊漢嘉奇絕冠西州九峰向日吟  
江葉三水通潮抱郡樓山自涪翁亭畔好泉從古  
佛髻中流東坡老去方思蜀不願人間萬戶侯

拔詩  
生不

願封萬戶侯亦不願識韓荆州但  
願身爲漢嘉守載酒時作凌雲遊

凌雲雜詠五首

爾雅臺

郭景純

郭生注蟲魚遺跡空山裏何處蔡充兒幾爲勸學死

大佛閣

韋南康鑿閣燬於袁韜唯佛像存

三十六莊嚴不生亦不滅朝夕三江潮如聞廣長舌

治易洞

宋吳秘

古洞何方廣垂蘿覆巖石想見昔年人研朱點周易

清音亭

東坡

振衣清音亭松桂鳴騷屑坐對大峨峰雲消露殘雪

洗墨池

東坡

初日石梁上猶傳洗墨池故山歸未得空和淵明詩

漢嘉竹枝五首

今嘉定州

龍游城郭碧玻瓈西望三峨曉黛滋分取三江作明鏡鏡中各自照蛾眉

城頭山色入虛無城下清波望鬱姑白塔紅船歸

去晚嘉州也復有西湖

側生一樹會江門水遞年年進大藩寂寞蜀宮三十載夕陽零落荔支園

竹公溪口水茫茫溪上人家賽竹王銅鼓蠻歌爭上日竹林深處拜三郎

平羌峽裏府江來西望青衣抱郭迴大佛足前相會合早潮晚汐不分開

三江岷江東來青衣水沫水西來至大佛前乃合流坡公詩奔騰過佛脚土人

謂岷江爲府江即錦江也

### 嘉陽登舟

青衣江水碧鱗鱗夾岸山容索笑新悵望三峨九

秋色飄零萬里一歸人  
亭臺處處餘金粉  
城郭家家繞綠蘋  
信宿嘉州如舊識  
荔支樓好對江津

江行望烏尤山

墨魚吹浪一江浮  
爾雅臺荒古木秋  
碧水丹山留不得  
風颿迴首別烏尤

犍爲道中

潮音閣下戒舟航  
迴首淩雲墮渺茫  
土俗漸臨巴子國  
江流遙接楚人鄉  
爐熏細細縈琴薦  
荻葉蕭蕭映筆牀  
天外峨眉如送客  
晴雲千片白毫光

犍爲縣

伐鼓犍爲郡清晨江霧黃城根藏杳靄帆勢入蒼  
茫古道唐蒙使輕舟陸賈裝西南皆郡縣何處夜  
郎王

兵欄舟中

山色高懸紫韎鞬江光倒射黃琉璃摩圍居士風  
流在爲訊戎州綠荔支

山谷晚號  
摩圍居士

敘州鎖江亭晚眺

望望朱提路夕陽千萬山落霞明極浦飛鳥近南  
蠻城角旌竿直江亭鐵鎖閑鬱姑臺咫尺煙靄畫  
圖間

南溪縣贈趙令勝千

廳事槐根出空城斷岸侵人多竈下養君是邑中  
黔燈火宣華夢曩歌濮獠音江安挂帆去揮手夕  
陽沈

江安縣

斜日玉津渡青山銅鼓灘蠻江來浩蕩行路飽艱  
難晚市稀橙客荒園罷橘官波濤三百里猶是怯  
兵欄

清溪

納溪縣西五里太白詩  
夜發清溪向三峽即此

蠻雲漏日影淒淒夾岸蕭條紅樹低好在峨眉半



卷之三  
輪月伴人今夜宿清溪

瀘州登忠山

江源分內外千里會瀘州歷歷五峰影茫茫三峽  
流青山煙外寺黃篾水邊樓夕照層城暮迴風引  
棹謳

撫琴渡

尹伯奇  
彈琴處

明月生琴渡似聞彈履霜猿聲何處發今夜宿江  
陽更有巴渝曲能霑旅客裳楓林前路遠葉葉似  
瀟湘

晨起渡江登五峰過北巖寺

江郭曉煙合攜琴來五峰水容青滑笏山態碧玲  
瓏雲樹孤城外風帆小市東香林迴望好下界一  
空濛

江陽兒祠

華陽國志云光武微時過江陽有一子新莽時人言江陽有貴兒氣求得殺之光武即位乃爲立嗣

蜀江陽人不使冠帶

悵望平陵松柏枝漢兵已集漸臺基不知白水真  
人氣枉向江陽殺貴兒

江陽竹枝三首

今瀘州

錦官城東內江流錦官城西外江流直到江陽復  
相見暫時小別不須愁

妾如江心黃龍堆江枯石爛長崔嵬郎如治平寺  
中塔戎州西望忽飛來

相傳敘州北江千塔頂飛  
至瀘州治平寺塔上而止

江邊草色映春衫百五梨花葉葉帆齊向城南  
青去繫舟多在使君巖

敘州流盃池瀘州使君巖皆山谷先生舊遊  
都不及訪悵然賦此

憶昨登凌雲江邊踠亂石興劇罷鞍馬逍遙散輕  
策徑危草露多處處見虎跡東林雨新霽初日射  
青壁浩蕩三江流安穩平如席西笑揖峨眉遙連  
雪山白酒酣挂帆去矯若生羽翮心知流盃池遺

踪在巴焚俗物敗人意交臂輕一擲今日使君巖  
南望還咫尺通詞託微波蹇修空脉脉平生一瓣  
香敢爲涪翁惜如何萬里遊虛幾兩屐回首望  
南雲蠻江日將夕

合江縣

鰓部蠻荒水東南裂地來江臨巴子闊山倚少岷  
開故國音書絕天涯老鬚催渝歌聲太苦中夜起  
徘徊

合江早發

放溜殘更裏熹微霽色閑鴉飛符縣北日出少岷

山衆水當渝會扁舟下瀨還客心爭歲暮猶自滯  
鳥蠻

西涼神祠曲

在合江縣符堅時呂光討李焉之亂至此土人祠之陸務觀謁祠詩我雖不識神知是山水人

不敢持笏來桓褐整幅巾似未詳本末賦詩正之

長安氏王頭有角東掃鄴宮西定蜀西域校尉婆  
樓兒勒銘直到岷山腹功成振旅咸陽中萬里玉  
門旌旆紅三十六國拜都護酒酣作賦龜茲宮甲  
乙識成苻氏滅魚羊食人日流血黑龍晝起姑臧  
城坐制三河亦人傑少岷山下岷江流西涼廟貌  
凌高秋山頭龍出作雲雨神靈雜沓風颼颼煙消

雨散渺何許靈欲歸兮憺容與船旗獵獵西北斜  
落日陰房竄蒼鼠

荔支灘

符關東下水漫漫挨柁開頭曉夢殘驚看盤渦如  
箭發片帆飛渡荔支灘

大磯腦即目

削壁臨江勢欲傾丹砂蘸葉一江明囊中正有鷺  
溪絹只少黃筌爲寫生

棹歌

紅葉磧邊紅葉飛黃魚沱上黃魚肥百丈牽江怯

西上三巴迎客好東歸

江津縣晚泊寄懷李綏陽公凱

路入江州愛晚晴青山紅樹眼中明斜陽潮送孤  
舟上沙岸人牽百丈行故國至今悲蔓子乘槎曾  
共訪君平城南便是牂柯路一夕相思白髮生

渝州夜泊

塗山斜月落巴國曙雞鳴亂艇煙初合三江潮夜  
生霜寒催曉角石氣肅高城不寐聞猿嘯迢迢入  
峽聲

題三忠傳

故四川巡撫陳公士奇重慶知  
府王公行儉巴縣知縣王公錫

已失夔門險誰云蜀道難三江潮不到萬馬競傳  
餐故國悲張許忠魂泣賀蘭當時渝水上慷慨白  
衣冠

塗山絕頂眺望

飛瀑落長虹登臨見禹功山圍巴子國苔沒夏王  
宮峒俗烏蠻近畬耕白帝同渝州天塹地感慨大  
江東

舟出巴峽

曲折真成字滄波十月天雲開見江樹峽斷望人  
煙新月數聲笛已歌何處船今宵羈客淚流落竹



枝前

長壽縣弔雪菴和尚

枳縣秋風愴客魂  
金川遺事忍重論  
誰從魚服悲宗國  
唯有烏朝戀舊恩  
葉下沉湘愁北渚  
蕪生鄢郢哭東門  
至今松柏灘頭水  
嗚咽寒潮弔屈原

涪州石魚

涪陵水落見雙魚  
北望鄉園萬里餘  
三十六鱗空自好  
乘潮不寄一封書

早登涪州北巖訪伊川先生注易洞憩碧雲

亭

巖有山谷題鉤  
深堂三大字

雞鳴截江去磊落見殘星古洞生蒼蘚層巖列翠  
屏五溪秋水岸萬里碧雲亭蜀洛清流盡千秋忌  
獨醒

麻姑洞二首

神仙官府事紛然懶漫誰能更學仙但乞麻姑爬  
背癢餘杭兌酒此中眠  
洞口無人蘚自青蓬萊清淺幾曾停他時小別三  
千歲又似當年過蔡經

忠州謁禹廟

空山神禹廟終古對巴臺玉座秋苔長江雲暮雨

來八蠻通道路九鼎沒蒿萊黑水梁州地茫茫問  
劫灰

屏風山謁陸宣公墓

賈傅長沙謫靈均澤畔吟千秋同涕淚萬里更登  
臨劒北崎嶇日山東父老心陽城如可作爲我助  
霑襟

詢白公東坡不得二首

巴歌渝唱總紛紛長慶新詩久不聞欲訪東坡但  
搔首浪花高捲入蠻雲

東坡東澗綠成陰刺史當年惠愛深想見竹枝歌

舞處木蓮花映水林檎

壤塗早發

夢迴峽月落卧聽舟人語風便五更潮天明到南

浦

萬縣古  
南浦地

萬縣有感

千秋南浦地險阻控三巴惡少仍雕面通侯各建  
牙何人飼豺虎吾道一龍蛇鼓角寒城暮江流捲  
白沙

岑公洞

岑公昔學道遺跡空山中洞門界飛流白日生雷

風石髓無古今鍾乳盡玲瓏巖泉日穿穴點滴成  
窪窪中央若累基狡獪造化功頽竈倚青壁中夜  
丹砂紅暎彼遺世翁於此悟參同壁間題字人歲  
月何匆匆巨碑亦笏立文詞競豪雄中間岑襄州  
頗擅語句工豈其南陽裔源流故難窮此洞與魯  
池望望江流通昔是仙靈宅今爲豺虎叢太息下  
山麓風健孤帆東

元符間岑巖起象求虛鑒真人贊一碑李鴻方叔所書岑洞魯池今皆爲侯家所有築砦其上

雲陽縣二首

杜老稽留地經過感倍生親知稀見面豺虎日橫  
行肺病誰相慰江流只自清千秋同灑淚回首謝

浮名

十月雲安縣千崖石氣青  
江寒風颯颯猿嘯雨冥冥  
鹽井筒時汲巴歌酒易醒  
天涯連歲暮心折杜鵑亭

帶經堂集卷二十七